

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹個後背跣起來，輝煌又晟目个金線就射入天頂。佢箭等該臺一騎就響歸路个老鐵馬，來到吾个百果園，還話講佢今晡日日頭一出來就到咗，算當早咧！無胚著，正踏入園肚，隔壁種大梨个阿權哥就在該大聲喊咧：「噯！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？仰會七早八早就來到？心肝還想等，嘴項又毋肯認輸，順嘴就應佢：「無啦！毋係來做事，來看鷓鴣得咗啦！」

吾个山園在山龍圍等个窩壠肚，若係堵著像今晡日恁樣个好天時，打早就會有三、四隻大鷓鴣，在四圍个山嶺頂飛啊飛欸。

同阿權哥个嘴鼓都還言搭煞，聽著遠遠个所在傳來「咻！咻！」个聲，鷓鴣出來咗！阿權哥看著鷓鴣出來，做等个山事也無心做咧，跣等一陣來搨接梨仔个工人，坐在吾工寮个蔭影²下欣賞這齣大自然个表演。

看佢兜閉開長長个翼胛、跣等氣流，慢慢仔迂、定定仔盤，

越迂越高、緊盤緊遠，到尾變做天邊个一粒烏點，就像係優雅个天頂王者，對天頂看等佢守護个土地。

成半下，還會看著佢兜胸挺挺、目盯盯仔停在脣項个樹極頂高，好恬恬無聲無說就從往下³，一矚目又轉身飛往上，該尖尖利利个爪項，既經夾等一尾挨著神頭个蛇哥，就一路「咻！咻！咻！」風神个飛入塞塞个樹林裡肚咗。

又成時，看佢兜在高高个天頂盤來飛去，忽然間，厥兩片翼胛一收，對天頂直直蹕⁴往下，吾心肝肚還想等：「這隻鷓鴣，這下穩死無命哩！」毋過，看佢硬硬都會撞著地泥咗，厥翼胛一閉、利爪一伸，一矚目時間，該利爪項，毋知哪時又抓著一隻圓身還在該扭啊扭个大老鼠咗。佢一轉身，又飛到半天高咧！

歸陣人看鷓鴣表演看到嘴擘擘仔，有人講：「難怪，在這搭山園做恁久事頭，難得看著蛇哥，就係有這兜鷓鴣守護這搭土地，戴在這四角圍个老嫩大細正有好安生生活啊！」

¹ 鷓鴣背：音 ieu poˋ zuiˋ；東勢東方山峰名，華語稱鳶嘴山。

² 蔭影：音 im iangˋ；陰影。

³ 從往下：音 jiungˋ gongˋ haˋ；往下俯衝。

⁴ 蹕：音 zud；觸擊、衝撞。

【竹蔗下个蟬仔】羅紫云原作

屋脣該墩竹蔗仔，種幾下年咁當大墩，斬忒又會過綻筍，繼續煞猛生到青禾禾仔，該竹蔗目長水多，清甜好食。

逐年大體到五月開始，日日到臨晝仔，竹蔗墩就會有一群著等青衫，當靚當得人惜个蟬仔。這兜頭大尾尖、翼又長个草蟬，細細仔像手指尾恁大隻定定，黏在這長長青色个竹蔗葉下，佢兜盡力粘在該啦歌哩曲，鬧熱煎煎。佢兜總係恁仔唱：「揸揸揸兒¹——揸揸揸兒——」清亮个歌聲，一直到下晝兩點零正會煞棚，毋識喊瘡。

草蟬仔下班過後，媠牯蟬²跔等上棚，佢黏在竹蔗仔脣該頭榮榮个苦棟樹頂，算係最大隻个蟬仔：圓身著等一身烏色个西裝盡亮線。大聲唱等佢兜个戀歌：「瞻³——瞻瞻瞻！瞻——瞻瞻瞻！」佢兜全部背等一臺天生个放送頭⁴，該聲咁发送到當遠个人都聽得著。佢心情好个時節，就阿腦佢兜唱歌仔真好聽；心情毋

好，又試著佢兜吵耳塞窟！毋過，一想著佢兜來到這世界，就淨短短幾日仔定定，就當佩服佢兜恁勇敢、恁煞猛打拚，來完成唯一愛做个聲事⁵——傳宗接代个精神。該，佢就無麼个好怨嘆，乜原諒佢兜个嘶骸另命咧！

在這鬧熱个時節，佢兜一張凳仔恬恬坐在竹蔗脣詳細聽，還會發現佢兜毋係儘採唱个哦！佢兜曉得照順序、有條理，成時獨唱、成時合唱，就像係有人指揮樣仔。佢兜个歌聲有時高亮、有時低吟，成下仔大聲、成下仔細聲；佢兜个音色乜無共樣，有个較尖、有个較溫柔。其實，蟬仔有當多種，佢兜一年、三年、五年、十三年、十七年，長年都歇在暗暗个泥竇肚。佢兜困在烏泥肚，培養破土个熱情，在多年个等待過後，化地底能量做聲量，衝破重圍，就為著這短短幾日仔个自由高唱。

佢心肝緊想：這墩竹蔗仔無掖肥，敢係因為聽了蟬仔熱情嘹亮个歌聲，正會緊生緊高緊榮？該佢兜人，乜愛像蟬仔恁知足，知恩圖報，逐日天轉笠媠花，這一生人就多姿多彩哩！

¹ 揸揸揸兒：音 iam iam iam iˊ；此指草蟬的叫聲。

² 媠牯蟬：音 maˊ guˊ samˊ；此指臺灣熊蟬。

³ 瞻：音 sam；此指臺灣熊蟬的鳴叫聲。

⁴ 放送頭：音 fong sung teuˊ；本指廣播電臺的放送亭、廣播站，後多指擴音器。

⁵ 聲事：音 sangˊ se；此指工作。

112 年全國語文競賽客家語朗讀文章國中學生組（四縣腔）

編號 5 號

【分牛籬蜂¹叨著】李政暉原作

佢分牛籬蜂叨著哩！

奈日朝晨，去山肚巡田水、做田事，無看著路脣个竹園項有大蜂竇，又無細義去撞著該支竹仔，佢兜就走來尋佢輸贏。惡豺豺仔个蜂仔黏時就飛在吾四圍挨挨轉，對等吾圓身黏一路來。佢搵忒一隻看知係牛籬蜂就驚到煞煞走，一片退、一片搵圓身同頭那毛頂頂个蜂仔。退到無蜂仔个所在，正感覺著頭那昂昂、人怪怪，遽遽行轉屋下奈一下來。

無幾久吾頭那殼、圓身、手髀同脅下開始腫起來會痛：頭那殼感覺就像雲飄在天頂，又分人絢等：浮浮、胖胖膨膨合纏纏，試著頭那昂昂、無法度思考。左手巴掌腫到像紅板樣仔，手痺痺、手指尾會伸毋會鉤；坐毋核、睡毋得，唉唉唧唧正經艱苦。若係有陰間，該時个佢應該係戴在裡肚。

落尾分人送去病院掛急診，講有十過隻个蜂仔叨著佢了後，醫生當認真對佢講：一般來講，分牛籬蜂叨有二十針以上就可能冇生命危險，這種个蜂仔無解毒个血清、忒傷重有時節會引起過

敏性休克抑係溶血个症頭，盡好愛先通知若屋下人。醫生安排吊大笏射²、注射同抽血，吩咐佢先在醫院歇一暗晡，若係有麼个毋鬆爽愛黏時講。

等佢略略仔眠一下，感覺好當多就想愛轉。毋過醫生愛佢歇加一下正看啊，盡好愛等屙出來个尿色有正常，若係變做深深个泥色就較麻煩愛送去大醫院。愛過等，等無麼个问题正做得出院。包尾，都無問題咧，醫生還係吩咐講：「開个藥仔，愛照三餐食；係有哪位毋鬆爽，就愛趕緊過來哦！」

轉屋下換衫褲正知，佢總共分蜂仔叨著十六針，兩隻手髀發炎、腫腫，有鱗癢个。左手巴掌還係紅腫無感覺、頭那暈暈想愛睡。睡到半夜緊爪，癢到人硬硬想愛同皮掀起來，想愛爪到骨頭去。食藥仔、膏藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效。食也，該暗晡，真神奇就好睡、毋會癢。

這下，分蜂仔叨个所在既經結痂也，看等這兜爛疤仔又加一擺分佢惱起：該時節、該兜蜂仔，佢一儕人在山肚，有幾危險也！

¹ 牛籬蜂：音 ngiu^ˇ lo^ˇ pung^ˊ；虎頭蜂。也說「油籬蜂」。

² 吊大笏射：音 diau tai gong^ˇ sa；吊點滴。

112 年全國語文競賽客家語朗讀文章國中學生組（四縣腔）

編號 6 號

【金黃色个旅行】曾雪蓉原作

旅行係一種盡好个休閒活動，做得分人个心情鬆爽，同最靚个回憶留下來，另外旅行也係一種學習，有一句話講：「行萬里路，贏過讀萬卷書」，在旅行个時節，一路項看著个、聽著个，可能比在書項學著个還較精彩、生趣。

印象裡肚，佢最懷念个一擺旅行，係前幾年俾八月半个時節，吾爺哀帶歸屋下人去花蓮遶祭。

佢兜來到花蓮富里个六十石山，一路項感覺花蓮个空氣特別好，一聲又一聲大鷄婆歡喜又自在个歌聲，響在彎彎幹幹个山路項，佢兜盤飛在高高个雲頂，打開梟雄个翼胛，無分日夜在這片山頭巡邏，佢兜係這片天地个山大王，也係保護者。

等阿爸同車仔停在忘憂亭，佢一下車就看著滿山坪个金針花開到當鬧、當打眼，想起識在電視裡肚看過一個紹介花蓮金針山个節目，講這位係一個靚到會分人「跳童」个所在，這句話正經半點都毋會差；在佢企在這高高涼亭个時節，看著歸片个山頭，變成金黃色个世界，間等泥香、野花香个山風對面吹過來該下，毋知仰仔，吾心肝頭就有一種感動還過幸福个感覺，佢想這就係

大自然个力量。

阿爸講：「前人種樹後人涼，前人種竹後人搖。」這山頭个金針花，係盡多前人開山打林開墾出來个，故所來到這邊祭个時節，愛曉得珍惜，毋單淨同這美景用相片帶轉屋下，也愛同自家个垃圾處理好，恁樣年年正有靚靚个風景好欣賞啊。

夕陽像一粒漬紅个柑仔，掛在天脣个時節，原本開到盡有精神个金針花，像約好共下下班樣仔，全眨等目珠互相偎憑，恬恬个睡忒咧；難怪金針花又安到「一日美人」，佢珍等朝陽疏床又在日頭落山時節，合起厥錫人个花蕊衫裙，做一個靚一日个美人。

時間過忒已久，有成時佢還係會想起該擺「金黃色个旅行」，親像又聽著大鷄婆歡喜个歌聲，盡久……盡久。

112 年全國語文競賽客家語朗讀文章國中學生組（海陸腔）

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹個後背爬起來，輝煌又晟眼個金線射落天頂。佢踪等該臺一騎斯歸路響個老自行車，來到個百果園，還話著講今晡日日頭一出斯來到這位，算當早咧！無想著，正踏落園肚，隔壁種大梨個阿權哥斯在該大聲喊咧！「喂！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？做麼個做得七早八早斯來到這位？心肝肚還想等，嘴町又毋肯認輸，對嘴斯應佢：「無啦！毋係來做事，係來看鷓鴣得似²啦！」

個園在龍崗圍等個窩肚，若係堵著像今晡日恁樣個好天時，打早斯會有三、四隻大鷓鴣，在四圍個山嶺頂飛啊飛仔。

撈阿權哥個嘴鼓都還言打煞，聽著遠遠個位所傳來「咻！咻！」個聲，鷓鴣出來咧！阿權哥看著鷓鴣出來，做等個山園事頭也無掛做咧，跔等一陣來搨接梨仔個工人，坐在佢該工寮個蔭影³下欣賞這齣大自然個表演。

看佢兜閑閑長長個翼胛、跔等燒氣，慢慢迂、定定仔盤，越迂越高、緊盤緊遠，背尾變成天邊個一隻烏點，當像優雅個天頂王者，對天頂看等佢兜守護個土地。

成下仔，會看著佢兜胸挺挺、目町町停在脣頭個樹樞頂高，好恬恬無聲無哨斯春往下，一瞞目轉身又飛往上，尖尖利利個爪町，拖等一尾挨著神頭個蛇哥，斯一路「咻！咻！咻！」風神哎哎⁴飛落密密個樹林裡肚。

又成下，看佢兜在高高個天頂盤來飛去，忽然間，兩片翼胛一收，對天頂直直粹往下，個心肝肚還想等：「這隻鷓鴣這下穩死無命咧！」毋過，看佢強強都會撞著地泥咧，翼胛一閉、利爪一伸，在頓恬個一瞞目時間，佢該雙利爪町，毋知哪時抓著一隻臘身還在該扭啊扭個大老鼠，一轉身又飛到半天高咧！

歸陣人看鷓鴣表演看到嘴擘擘仔，有人講：「難怪，在這垵山園做恁久個事，難得看著蛇哥，斯係有這兜鷓鴣守顧這搭土地，戴在這四圍個老嫩大細正有好平安生活啊！」

¹ 鷓鴣背：音 rhau⁺ po zui^ˊ；東勢東方山峰名，華語稱鷓鴣山。

² 得似：音 ded sii⁺；語助詞，表確定。

³ 蔭影：音 lim⁺ rhang^ˊ；樹下照不到太陽的地方。

⁴ 風神哎哎：音 fung^ˋ shin ngai^ˋ ngai^ˋ；洋洋得意。

【甘蔗下个蟬仔】羅紫云原作

屋脣該埕¹竹甘蔗²種幾下年咧，當大叢，斬忒又會過綻筍，繼續煞猛生到青里里仔，長目多汁，清甜好食。

逐年大體對五月開始，日日到臨晝仔，就會有一群著等青衫，當靚、當得人惜，頭大尾尖、翼長个草蟬，細細仔像手指尾恁大隻定定，黏在這長長青色个甘蔗葉下，盡命粘在該啦歌哩曲，鬧熱煎煎。佢兜總係唱等：「揸揸揸啲³——揸揸揸啲——」甜美个歌聲，一直到下晝兩點零正會煞棚，完全無喊慄。

草蟬下班，續等嫲牯蟬⁴跔等上棚，毋過，嫲牯蟬係黏在竹甘蔗脣該叢榮榮个苦棟樹頂，佢算係最大隻个蟬仔，臉身著等一身烏色个西裝盡派頭，大聲唱等屬於佢兜个愛戀歌：「蟬——蟬蟬蟬！蟬——蟬蟬蟬！」佢兜做下背等一臺自家製造个放送頭⁵，亮亮个聲放送到盡遠都聽得著。佢心情好个時節，就安腦佢兜唱歌仔當好聽，心情毋好時，又試著佢兜吵耳塞窟。但係一想著佢兜

來到這世界上，斯有短短幾日仔，就當佩服佢兜恁勇敢、恁煞猛打拚个精神，來完成唯一愛做个聲事⁶——傳宗接代，該就無麼个好怨嘆，乜原諒佢兜个嘶骸另命咧。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，曉得照順序、有條理，成時獨唱、成時合唱輪等來，像有人指揮樣，聲音有嘹亮、低沉；時大、時細，所發出个聲無幾共樣，有个較尖；有个較溫柔。其實，蟬仔有當多種，有一年、三年、五年、十三年、十七年个，長年都戴在泥竇肚不見天日。在暗摸摸个烏泥裡肚，培養破土个熱情；在多年个等待中，化地底个能量做聲量，衝破重圍飛出來，就係為著這短短幾日个自由。

佢心肝肚緊想：這埕甘蔗無落肥，敢係因為聽了蟬仔熱情嘹亮个歌聲，正緊生緊高緊榮？該恁俚人，乜愛像蟬仔恁知足，知恩圖報，逐日天轉笠嫲花，這一生人就多姿多彩咧！

¹ 埕：音 pu；量詞，堆。

² 竹甘蔗：音 zhug gam` zha`；綠皮的甘蔗。

³ 揸揸揸啲：音 rham+ rham+ rham+ rhi；草蟬的叫聲。借字。

⁴ 嫲牯蟬：音 ma gu` sham；此指臺灣熊蟬。

⁵ 放送頭：音 fong` sung` teu；麥克風。

⁶ 聲事：音 shang` she+；工作。

【 盞蜂叨著記 】 李政暉 原作

分盞蜂仔¹叨著咧！

該日朝晨去山肚巡水做事，無看著路脣个竹林頂高有大蜂竇，乜無細義撞著該支竹仔，佢兜就尋著佢。惡豺豺个蜂仔黏時斯飛在佢脣頭迂迂轉，向等佢个臉身黏過來。佢搵開一隻看起來係盞蜂仔，驚到煞煞走，一頭退、一頭搵臉身搵頭那毛頂高个蜂仔。退到無蜂仔个位所，正感覺頭那暈暈人怪怪，遽遽行轉屋歇睏一下。

無幾久，佢个頭那、臉身、手髀搵腓下開始做下會痛，頭那感覺像雲浮在天頂，又分人縞等樣，浮浮、腫腫又合縲縲，歸隻頭那昂昂²無法度思考。左手个手巴掌腫到像紅板，手痺痺、手指尾會伸毋會勾；坐毋核、睡毋得，唉唉唧唧實在艱苦，係做得，斯想囡到泥竇肚去。

最尾分人送去醫院掛急診，講著有十過隻蜂仔叨著佢了後，醫生當認真搵佢講：「一般來講，分盞蜂仔叨著二十針以上，斯可能有生命危險，這種个蜂仔無解毒个血清、較傷重个成時會引

起過敏性个失氣無斯溶血个症頭，最好愛先通知你屋下人。」醫生安排吊大笏射³、注射搵抽血，交代佢先歇睏一下，係有麼个所爭愛黏時講。

等佢略略仔睡一下過後，感覺好盡多斯想愛轉去。毋過醫生愛佢過歇睏一下觀察看啊，最好等屙尿个尿水色正常正好轉，若係變烏暗个泥色，斯較麻煩愛送大醫院，愛一直等到無麼个问题正做得出院。最尾都無問題咧，醫生還係掛心講：「開个藥仔愛照三餐食，有哪位無鬆爽就愛煞煞過來哦。」

轉屋下換衫褲正知總共叨著十六針，兩支手髀發炎紅腫，非常痲⁴。左手个手巴掌還係紅腫無感覺、頭那暈暈想愛睡。睡到半夜緊爪，痲到硬硬愛搵皮掀開、爪到骨髓去。食藥仔、膏藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效，當神奇，食了該暗晡斯盡好睡毋會痲咧。

這下蜂仔叨个位所已經結疔咧，看著這兜堅疔又過一擺分佢想著：該時節、該兜蜂仔，佢一個人在山肚有幾危險！

¹ 盞蜂仔：音 ang` pung` er；虎頭蜂。

² 昂昂：音 ngong ngong；頭昏神智不清。

³ 吊大笏射：音 diau` tai` gong sha`；吊點滴。

⁴ 痲：音 hoi；癢。

112 年全國語文競賽客家語朗讀文章國中學生組（海陸腔）

編號 6 號

【金黃色个旅行】曾雪蓉原作

旅行係一種當好个休閒活動，做得分人心情鬆爽，又做得膠最靚个回憶留下來，另外旅行也係一種學習，有一句話講：「行萬里路，贏過讀萬卷書」，在旅行个時節，一路看著个、聽著个，可能比在書實肚學著个還較精彩、生趣。

在印象裡肚，佢最懷念个一擺旅行，係前幾年俾八月半个時節，爺哀帶佢歸屋下人去花蓮遠寮。

佢兜來到花蓮富里个六十石山，一路上感覺花蓮个空氣特別好，一聲又一聲大鷄婆歡喜又自在个歌聲，響在彎彎幹幹个山路叮，佢兜盤飛在高高个雲頂，打開梟雄个翼胛，無分日夜在這遍山頭巡邏，佢兜係這遍天地个山大王，也係保護者。

等阿爸膠車仔停在忘憂亭，佢一下車就看著滿山滿坪个金簪花¹開到當鬧、當打眼，想起識在電視裡肚看過一隻紹介花蓮金簪山个節目，講這位係一隻靚到會分人「發狂」个所在，這句話正經半點都毋會爭差。在佢企在這高高个涼亭時節，看著歸遍个山頭，變成金黃色个世界，帶等泥香、野花香个山風在對面吹過來

該下，毋知仰般，佢个心肝頭就有一種感動還有幸福个感覺，佢想這就係大自然个力量。

阿爸講：「前人種樹後人涼，前人種竹後人搖。」這山頭个金簪花，係盡多前人開山打林開墾出來个，所以來到這邊寮个時節，愛曉得珍惜，毋單淨愛膠這美景用相片帶轉屋下，也愛膠自家个垃圾處理好，恁樣年年正有靚靚个風景好欣賞啊！

在夕陽像一隻啾紅个柑仔，掛在天邊个時節，本旦開到盡有精神个金簪花，像約定好共下下班樣，全眨等目珠互相偎憑，恬恬仔睡忒咧；難怪金簪花又安到「一日美人」，佢跔等朝陽跣床，又在日頭落山時節，合起佢錫人个花裙，做一隻靚一日个美人。

時間過忒盡久，成時佢還係會想起該擺「金黃色个旅行」，當像又聽著大鷄婆歡喜个歌聲，盡久……盡久。

¹ 金簪花：音 gim` zam` fa`；金針花。

112 年全國語文競賽客家語朗讀文章國中學生組（大埔腔）

編號 3 號

【鷓婆飛啊飛】張瑞玲原作

打早，日頭正對東片鷓婆背¹个背尾升疏來，輝煌又晟目个金線射入天頂。佢踏緊該臺一騎斯響歸路个老鐵馬，來到吾个百果園，還話講今晡日頭一出來斯到位，算當早咧！無胚想，正踏入園肚，隔壁種大梨个阿權哥斯在該大聲咻咧！「喂！日頭恁高咧正到位哦，曾做有事？」

唉！佢都恁早咧，還輸佢，這阿權哥係歸暗晡毋使睡係無？做麼使得七早八早斯來到位？心肝還想緊，嘴頂又毋肯認輸，對嘴斯應佢：「無啦！毋係來做事，來看鷓婆得啦！」

吾个林園在山龍圍緊个窩肚，若堵著像今晡恁泥个好天時，打早斯會有三、四隻大鷓婆，在四圍个山嶺頂飛啊飛。

同阿權哥个嘴鼓都還言搭煞，聽著遠遠个所在傳來「咻！咻！」个聲，鷓婆出來咧！阿權哥看著鷓婆出來，做緊个山園事頭也無掛做咧，跔核一陣來搨接梨个工人，坐在吾工寮个蔭影²下欣賞這齣大自然个表演。

看厥等閉開長長个翼胛、跔緊燒氣，慢慢迂、定定盤，越迂

越高、緊盤緊遠，到尾變做天邊个一粒烏點，親像優雅个天頂王者，對天頂看落厥等守護个土地。

成半下，會看著厥等胸挺挺、目盯盯停在脣頂个樹樑頂高，好恬恬無聲無說斯從往落³，一曠目轉身又飛往上，尖尖利利个爪頂，夾緊一尾挨著神頭个蛇哥伯，斯一路「咻！咻！咻！」風神喋喋飛入密密个樹林裡肚。

又有成下，看厥等在高高个天頂迂來迂去，忽然間，兩片翼胛一收，對天頂直直墜往落，吾心肝肚還想緊：「這隻鷓婆這下包穩死無命咧！」毋過，看佢硬硬都會撞著地泥咧，翼胛一閉、利爪一伸，黏時都頓恬个一曠目時間，厥該雙利爪頂，毋知哪時抓著一隻圍身還在扭啊扭个大老鼠，一轉身又飛到半天高咧！

歸陣人看鷓婆表演看去嘴擘擘，有人講：「難怪，在這搭林園做恁久事頭，難得看著蛇哥，斯係有這兜鷓婆守護這搭土地，戴在這四角圍个老嫩大細正有好安生生活啊！」

¹ 鷓婆背：音 rhau` po` zui`；東勢東方山峰名，華語稱鳶嘴山。

² 蔭影：音 rhim` rhang`；陰影。

³ 從往落：音 zong` gong+ log`；往下俯衝。

【糖蔗下个蟬】羅紫云原作

屋脣該蒲¹糖蔗，種幾下年了變當大蒲，斫撇又還過煞猛綻筍，生去青荷荷咧，蔗身長目又多汁，清甜好食。

逐年大體五月開始，日日到臨晝邊，斯會有一陣著青衫，頭大尾尖翼長長，像手指尾恁大細細隻个草蟬，黏在該長長青色个甘蔗葉下，盡命在該啦歌哩曲，鬧熱濟借，厥等總係唱緊：「揸揸揸²——揸揸揸²——」甜美个歌聲，直直到下晝兩點零正會煞棚³，毋識喊恠。

草蟬下班隨後嫲牯蟬⁴珍核上棚，毋過，嫲牯蟬係黏在糖蔗脣該頭榮榮个苦棟樹頂，佢算係盡大隻个蟬，圓身著緊一身烏色个西裝已澄線，大聲唱出屬於厥等个愛戀歌：「蟬⁵——蟬蟬蟬！蟬——蟬蟬蟬！」厥等背緊一臺自家製造个放送頭⁶，該聲亮放到當遠都還聽得著。吾心情好个時節，斯安腦厥等唱歌真好聽，

心情毋好該下又試著厥等吵耳吵鼻。毋過一想著厥等來到這世上，淨有短短幾日等，斯當欽服厥等該勇敢煞猛打拚个精神，為著完成唯一愛做个大事——傳宗接代，該斯無麼个好怨嘆，乜原諒厥等个抽骸另命咧。

在這恁鬧熱个時節，佢兜張凳恬恬坐在甘蔗脣斟酌聽，還會發覺厥等毋係儘採唱个哦，曉得照順序有條理，成半下單唱一半下合唱輪核來，像有人指揮个樣，聲音有清亮、低沉、成下大成下細，所發出个聲無幾共樣，有个較尖有个較溫柔。其實，蟬有當多種，有一年、三年、五年、十三年、十七年，長年都戴在泥肚無見天日。囿在烏泥肚，培養破土个熱情；多年个等待，化地泥肚个能量做聲亮，突破重圍，斯為著這短短幾日个自由飛出。

吾心肝緊恸：這蒲糖蔗無落肥，敢係因為聽著蟬熱情清亮个歌聲，正緊生緊高緊榮？該恁人，乜愛像蟬恁知足，知恩圖報，逐日天轉笠嫲花，這一生人斯多姿多彩咧！

¹ 蒲：音 puˋ；叢，植物叢生。

² 揸揸揸：音 rhamˋ rhamˋ rhamˋ rhi+；草蟬的叫聲。借字。

³ 煞棚：音 sodˋ pangˋ；結束。

⁴ 嫲牯蟬：音 maˋ guˋ shamˋ；此指臺灣熊蟬。

⁵ 蟬：音 shamˋ；此指臺灣熊蟬的鳴叫聲。

⁶ 放送頭：音 fongˋ sungˋ teuˋ；麥克風。

112 年全國語文競賽客家語朗讀文章國中學生組（大埔腔）

編號 5 號

【油籬蜂叮著記】李政暉原作

分油籬蜂叮著咧！

該朝脣去山頂巡水做事，無看著路脣个竹林內肚有大蜂竇，乜無細義自家去撞著¹該支竹篙，歸陣个蜂尋著佢。惡桀桀²湧出來黏時斯飛到吾四圍，對吾圓身斯柑過來。佢陪著一隻，一看正知係油籬蜂驚都佢拚緊走，緊退緊陪圍身同頭那毛、面頂个蜂。退到無蜂个所在正試著頭那浮浮人怪怪，行轉屋家想歇睏下。

無幾久吾頭那、圍身、手髒同脅下開始會疾：頭那感覺像雲在天頂飄，又分人縹緲縲樣，暈³都無法度思考。左手巴掌腫去像紅龜板，手痺痺、手指尾會伸毋會鉤；坐毋核睡毋得，唉唉嗷嗷實在還艱苦。若係有陰間，該時節个佢應該係戴在內肚。

臨尾分人送去病院掛急診，講著有十外隻个蜂叮著佢了後，醫生認真同佢講：「普通來講油籬蜂叮著二十針以上，斯可能有危險，這款个蜂無解毒个血清、傷重个成下會引起過敏性失魂抑

係溶血个症頭，盡好愛先通知若屋家个人。醫生安排吊大筴⁴、注射同抽血，交代佢先歇睏下，若有麼个毋堵好愛黏時講。

等佢略略歇下了後，試著人加已好斯想愛轉去。毋過醫生愛佢加歇一駁觀察看，盡好等屙出來个尿色正常，若係變暗泥色斯較費氣愛送大間病院。愛過加等下，無麼个问题正使得出院。頭尾做下無問題醫生還係掛心講：「開个藥愛照三餐食，有麼个無快活斯愛遽兜倒轉來哦。」

轉屋家換衫褲時正知，總共叮著十六針，兩隻手髒發紅腫跣來，有罅癢。左手巴掌還係紅紅腫腫無感覺、頭那暈暈想睡。睡到半夜還緊爪，癢都硬硬愛同皮掀開、爪到骨頭髓。食藥、抹藥乜無麼效，堵好有人紹介講臺灣有一種牛樟菇使得清肝解毒，無定著對蜂毒有效。食過該暗晡正經好睡毋會癢咧。

這滿蜂叮个所在既經結疔，看著這兜堅疔斯過一擺分佢想著：該時節个該兜蜂，佢一個人在山肚有幾危險。

¹ 撞著：音 dung` do`；接觸、碰到某物。

² 惡桀桀：音 og` kied` kied`；很凶惡的樣子。

³ 暈：音 ngong`；頭昏神智不清。

⁴ 吊大筴：音 diau` tai` gong`；吊點滴。

112 年全國語文競賽客家語朗讀文章國中學生組（大埔腔）

編號 6 號

【金黃色个旅行】曾雪蓉原作

旅行係一種盡好个休閒活動，使得分人个心情鬆爽，同盡靚个回憶留落來，另外旅行也係一種學習，有一句話講：「行萬里路，贏過讀萬卷書」，在旅行个時節，一路項看著个、聽著个，可能比在書項學著个還較精彩、生趣。

在印象裡肚，佢盡懷念个一擺旅行，係前幾年佢八月半个時節，吾爺哀帶歸屋家人去花蓮遶寮。

吾等來到花蓮富里个六十石山，一路項感覺花蓮个空氣特別好，一聲又一聲大鷄婆歡喜又自在个歌聲，響在彎彎幹幹个山路項，厥等迂在高高个雲頂，打開梟雄个翼胛，無分日夜在這片山頭巡邏，厥等係這片天地个山大王，也係保護者。

等阿爸同車停在忘憂亭，佢一落車斯看著滿山坪个金針花開來當鬧、當打眼，想著識在電視裡肚看過一個紹介花蓮金針山个節目，講這位係一個靚都會分人發狂个所在，這句話正經半屑都毋會差；在佢企在這高高涼亭个時節，看著歸片个山頭，變做金黃色个世界，在間緊泥香、野花香个山風對面吹過來該下，毋知仰脣，吾心肝頭斯有一種感動還有幸福个感覺，佢想這斯係大自

然个力量。

阿爸講：「前人種樹後人涼，前人種竹後人搖。」這山頭个金針花，係當多前人開山打林開墾出來个，因致來到這遶寮个時節，愛曉得珍惜，毋單淨同這美景用相片帶轉屋家，也愛同自家个垃圾處理好，恁泥年年正有靚靚个風景好欣賞啊。

斯在夕陽像一粒啾紅个柑，掛在天邊个時節，本旦開來當有精神个金針花，像約定好共下下班个樣，全奔緊目珠互相偎憑，恬恬睡撒咧；難怪金針花又安做「一日美人」，佢踅核打早个日頭翫床又在日頭落山時節，合起厥該錫人个花蕾衫裙，做一個靚一日个美人。

時間過撒好久咧，成下佢還係會恹起該擺「金黃色个旅行」，親像又聽著大鷄婆歡喜个歌聲，當久……當久。

112 年全國語文競賽客家語朗讀文章國中學生組（饒平腔）

編號 3 號

【鷓婆飛啊飛】張瑞玲原作

打早，日頭正對東片鷓婆背¹个背尾升起來，輝煌又晟眼个金線射入天頂。佢箭等該臺一騎斯響歸路个老自行車，來到佢个百果園，還話講今晡日日頭一出來斯到位，算當早了！無胚著，正踏入園肚，隔壁種水梨个阿權哥斯在該大聲嘍了！「喂！日頭恁高了正到位哦，仰做有事？」

唉！佢都恁早了，還輸佢，這阿權哥係歸暗晡毋使睡係無？仰會七早八早斯來到位？心肝還想等，嘴項又毋肯認輸，對嘴斯應佢：「無啦！毋係來做事，係來睺鷓婆个啦！」

佢个園在山龍圍等个窩肚，若堵著像今晡日恁樣个好天時，打早斯會有三、四隻大鷓婆，在四圍个山嶺頂飛啊飛。

撈阿權哥个嘴鼓都還言打煞，聽著遠遠个所在傳來「咻！咻！」个聲，鷓婆出來了！阿權哥睺著鷓婆出來，做等个山園事頭也無心做了，跔等一陣來搵接梨个工人，坐在佢工寮个蔭影²下欣賞這齣大自然个表演。

¹ 鷓婆背：音 rhiau po zui / rhiau` po` zui` / iau` po` zui`；東勢東方山峰名，華語稱鷓嘴山。

² 蔭影：音 lim` rhiang` / lim` rhiang` / lim` iang`；陰影。

睺佢兜閉開長長个翼胛、搵等熱氣，慢慢迂、定定盤，越迂越高、緊盤緊遠，到尾變做天邊个一粒烏點，就像優雅个天頂王者，對天頂睺等佢兜守護个土地。

成下，會睺著佢兜胸挺挺、目盯盯停在脣項个樹極頂高，好點點無聲無哨說斯種往下³，一瞞目轉身又飛往上，尖尖利利个腳爪，夾等一尾挨著神頭个蛇哥，斯一路「咻！咻！咻！」風神哎哎飛入密密个樹林裡肚。

又有成下，睺佢兜在高高个天頂盤等，忽然間，兩片翼胛一收，對天頂直直粹往下，佢心肝肚還想等：「這隻鷓婆穩死無命了！」毋過，睺佢硬硬都會撞著地泥了，翼胛一閉、利爪一伸，黏時頓恬个一瞞目時間，佢該雙利爪，毋知哪時抓著一條臉身還在該扭啊扭个大老鼠，一轉身又飛到半天高了！

歸陣人睺鷓婆表演睺到嘴擘擘，有人講：「難怪，在這搭園做恁久事頭，難得睺著蛇，斯係有這兜鷓婆守護這搭所在，戴在四周圍个老嫩大細正有好安心生活啊！」

³ 種往下：音 zhung` gong` ha` / zung` gong` ha`；往下俯衝。

【甘蔗下个蟬仔】羅紫云原作

屋脣該埕¹竹甘蔗²，種幾下年了當大叢，斬忒又會過綻筍，等生到青里里仔，就變成蟲類園尋个好所在。

逐年大體到五月開始，日日到臨晝仔，就會有一群著等青衫，當靚當得人惜，頭大尾尖翼長，細細仔像手指尾恁大隻定定个草蟬，黏在長長青青个甘蔗葉下，盡力拈在該啦歌哩曲，佢兜總係唱等：「揸揸揸³——揸揸揸——」，完全無喊恠，一直愛到下晝兩點零正會煞棚⁴。

草蟬下班後，嫲牯蟬⁵隨躡等上棚，毋過，嫲牯蟬係黏在竹甘蔗脣該叢榮榮个苦棟樹頂，佢算係最大隻个蟬仔，臉身著等一身烏色个西裝盡亮線，大聲唱等佢兜个愛戀歌：「蟬⁶——蟬蟬蟬！蟬——蟬蟬蟬！」佢兜都背等一臺自家製造个放送頭⁷，該聲亮到

盡遠都聽得著。佢心情好个時節，就安腦佢兜唱歌真好聽，心情毋好時，又試著佢兜吵耳塞窟，但係一想著佢兜來到這世上，斯有短短幾日仔，就當佩服佢兜恁煞猛打拚來完成唯一愛做个聲事⁸——傳宗接代，也做得原諒佢兜个嘶骸另命了。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，係有順序、有條理个，成時獨唱、成時合唱輪等來，像有人在該指揮樣，聲音一下亮、一下低、一下大、一下細，正經係千變萬化。其實，蟬仔有當多種，有兜一年、三年、幾年都戴在泥竇肚不見天日。佢兜困在烏泥肚，培養破土个熱情；在多年个等待之下，化泥力變做聲量，等鑽出重圍，就在這短短个幾日仔盡命拈。

佢心肝肚想：這埕甘蔗無落肥，敢係因為聽了蟬仔熱情嘹亮个歌聲，正緊生緊榮？該恁俚人乜愛好好來學習蟬仔，恁知恩圖報！

¹ 埕：音 pu / pu`；叢、顆的意思。

² 竹甘蔗：音 zhug` gam` zha` / zug` gam` za`；綠皮的甘蔗。

³ 揸揸揸：rham` rham` rham` i；草蟬的叫聲。借字。

⁴ 煞棚：音 sod` pang / sod` pang`；結束。

⁵ 嫲牯蟬：音 ma gu` sham / ma` gu` sam`；熊蟬。

⁶ 蟬：音 sham；熊蟬的叫聲。

⁷ 放送頭：音 fong` sung` teu / fong` sung` teu`；麥克風。

⁸ 聲事：音 shang` she` / sang` se；工作。

112 年全國語文競賽客家語朗讀文章國中學生組（饒平腔）

編號 5 號

【 盜蜂叮著記 】 李政暉 原作

分盜蜂仔叮著了！

該日晨早去山肚巡水做事，無睺著路脣个竹林肚有大蜂竇，嘛無細義撞著¹該枝竹篙，黏時，惡豺豺²个蜂仔就飛在佢个四周圍，對等佢臉身叨過來。佢睺係盜蜂仔，就著驚煞煞走，一頭退一頭陪臉身膠頭那毛面个蜂仔。退到無蜂仔个所在，正感覺頭那慳慳人怪怪，就遽遽行轉屋下歇睺一下。

無幾久，佢頭那殼、臉身、手髀膠脣下通棚開始疾，頭那殼感覺像雲浮在天嶼，還分人縊到腫腫又纏纏，害頭那昂昂³無法度思考。左手个巴掌嫲腫到像大紅版，手痺痺、手指尾會伸毋會勾；坐毋核、睡毋得，唉唉唧唧真艱苦，就像戴在陰間樣。

包尾分人送去病院掛急診，聽著佢分十過隻蜂仔叨，醫生認真對佢講，普通人分盜蜂仔叨著二十針以上就可能有生命危險，這種个蜂仔無解毒个血清，卡傷重⁴時會引起各種个症頭，最好愛

先通知你屋下人。醫生安排懸大笏射⁵膠抽血，交代佢先歇一下睺，若係有麼个無堵好愛黏時講。

等佢略略睡一睺後，感覺好當多就想愛轉屋下。毋過醫生愛佢加歇一下觀察睺啊，最好等尿水色正常，若係變烏暗泥色就較麻煩，愛送大間个病院。等加一下，無麼个问题，做得出院了，醫生還係吩咐講：「開个藥愛照三餐食吓，有麼个無鬆爽就愛煞兜倒轉來哦。」

轉屋下換衫褲正知全部叨著十六針，兩隻手髀紅腫，當癢。左手巴掌還係紅腫無感覺、頭那暈暈想愛睡。睡到半夜緊掘，癢到想愛膠皮掀開、掘到骨頭髓。食藥、膏藥無麼个效，堵好有人紹介講臺灣有一款牛樟菇做得強肝解毒，無定著對蜂毒有效，真神奇，食了該日暗晡就當好睡毋會癢。

這下蜂仔叨著个所在結疔了，睺著這兜疔，轉想著該兜蜂仔，當時淨自家一儕人在山肚有幾危險。

¹ 撞著：音 dung do` / dung` do^；接觸、碰到某物。

² 惡豺豺：音 og` sai sai / og` sai` sai`；很凶惡的樣子。

³ 昂昂：音 ngong ngong；頭昏神智不清。

⁴ 傷重：音 shong` diong` / song` diong^；很嚴重。

⁵ 懸大笏射：音 vien` tai` gong sha`；吊點滴，亦可說「吊大笏射」，音：diao^ tai gong` sa。

112 年全國語文競賽客家語朗讀文章國中學生組（饒平腔）

編號 6 號

【金黃色个旅行】曾雪蓉原作

旅行係一種盡好个休閒活動，做得分人个心情鬆爽，摺最靚个回憶留下來，另外旅行也係一種學習，有一句話講：「行萬里路，贏過讀萬卷書。」在旅行个時節，一路項脛著个、聽著个，可能比在書頂學著个還較精彩、心色。

在印象裡肚，佢最懷念个一擺旅行，係前幾年佢八月半个時節，佢爺哀帶歸屋下人去花蓮遶寮。

佢兜來到花蓮富里个六十石山，一路感覺花蓮个空氣特別好，大鷓婆一聲又一聲歡喜自在个歌聲，響在彎彎幹幹个山路項，佢兜飛到高高个天頂，打開梟雄个翼胛，在山頭巡邏，佢兜係這片天地个大王，也係保護者。

等阿爸摺車仔停在忘憂亭，佢一下車就脛著滿山坪个金簪花開到當鬧、當打眼，想起識在電視裡肚脛過一隻紹介花蓮金針山个節目，講這位係一隻靚到會分人「起乩跳童」个所在，這句話正經半點都毋會差；在佢企在這高高涼亭个時節，脛著歸片个山頭，變成金黃色个世界，裡背間等泥香、野花香个山風對面吹過來該下，毋知仰般，佢心肝頭就有一種感動、還有幸福个感覺，

佢想這就係大自然个力量。

阿爸講：「前人種樹後人涼，前人種竹後人搖。」這山頭个金簪花，係盡多前人開山打林開墾出來个，所以，來到這邊寮个時節，愛曉得珍惜，毋單淨摺這美景用相片帶轉屋下，也愛摺自家个垃圾處理好，恁樣年年正有靚靚个風景好欣賞啊。

臨暗个日頭像一粒漬紅个柑仔，懸在天邊个時節，本旦開到盡有精神个金簪花，像約定好共下下班个樣仔，全眨等目珠互相偎憑，恬恬仔睡忒了；難怪金簪花又安到「一日美人」，佢跔等朝陽跔起來，又在日頭落山時節，合起佢該錫人个花蕊衫裙，做一個靚一日个美人。

時間過忒已久了，有成時佢還係會想起該擺「金黃色个旅行」，親像又聽著大鷓婆歡喜个歌聲，盡久……盡久。

112 年全國語文競賽客家語朗讀文章國中學生組（詔安腔）

編號 3 號

【鷓鴣飛啊飛】張瑞玲原作

打早，日頭正對東片裡鷓鴣嘴¹個後背升起來，金黃又晟目個金線射入天嶼。佢較緊蹬遐臺一騎即鳴歸路個老鐵馬，來到佢個百果園，猶想講今日日頭一出來即到位，算真早啊！無想著，正蹬入園內，隔壁種大梨個阿權哥即在遐大聲咻啊！「喂！日頭恁高啊正到位哦，敢做有事？」

唉！佢攏恁早啊，猶輸佢，這個阿權哥係歸暗夜毋使睡係無？做麼個會用七早八早即來到位咧？心肝猶在想，嘴又毋肯認輸，對嘴即應佢：「無啦！毋係來做事，係來睺鷓鴣個啦！」

佢個林園在山龍圍核個窩內，若堵著像今日恁個好天氣，打早即會有三、四隻大鷓鴣，在四脣個山嶼飛啊飛。

和阿權哥個嘴鼓都猶旨答煞，聽著遠遠個所在傳來「咻！咻！」個聲，鷓鴣出來啊！阿權哥睺著鷓鴣出來，要緊個山園事頭嘛放落，跔一陣來鬥接梨個工人，坐在佢工寮個蔭影²下欣賞這齣大自然個表演。

睺佢人展開長長個翼胛、利用熱氣，慢慢翹、款款子盤，越

翹越高、若盤若遠，到尾變做天嶼個一粒烏點，親像優雅個天嶼王者，對天嶼睺落佢人守護個土地。

一半下，會睺著佢人胸澄澄、目直直歇在脣頭個樹樞面上，好定泥無聲無說即從落，一矚目轉身又飛向上，尖尖利利個爪，夾著一尾堵著否運個蛇，即歸路「咻！咻！咻！」風神喋喋飛入密密個樹林內底。

又有時務，睺佢人在高高個天嶼迴來迴去，好定泥，兩裡翼胛一收，對天嶼直直墜落，佢心肝內猶想：「這隻鷓鴣這下包穩死無命啊！」毋過，睺佢硬硬討撞著泥下，翼胛一展、利爪一伸，黏時討頓恬個一矚目時間，佢遐雙利爪，毋知哪時捉著一隻臉身猶在扭啊扭個大隻老鼠，一轉身又飛到半天高啊！

歸陣人睺鷓鴣表演睺到嘴擘擘，有人講：「難怪，在這林園做恁久個事頭，罕得睺著蛇，即係有這兜鷓鴣守護這兜土地，蹠在這四角輪轉個老嫩大細正有通安心生活啊！」

¹ 鷓鴣嘴：音 rhio` poo` zhe`；東勢東方山峰名，華語稱鳶嘴山。

² 蔭影：音 rhim` rhang`；陰影。

112 年全國語文競賽客家語朗讀文章國中學生組（詔安腔）

編號 4 號

【蔗下个蟬】羅紫云原作

屋脣遐蔗白蔗，種幾下年啊真大蔗，斬莫又會攞暴穎，生到青拚拚，闊目¹多汁，清甜好食。

逐年大約到五月開始，逐日到俛暗，即會有一陣著青衫，真靚真得人惜頭大尾尖翼長个草蟬，細細像手指尾恁大隻定，黏在這長青色个蔗葉下，出力像在遐唱歌弄曲，鬧熱滾滾。佢人總係唱著：「炎炎兒²——炎炎兒——」甜甜个歌聲，一直到下晝兩點外正會煞棚³，歸下無喝恹。

草蟬下班了後烏蟬⁴跔个上棚，毋過，烏蟬係黏在白蔗脣遐弓弓个苦棟樹嶼，佢算係頭大隻个蟬，臉身著一身烏色个西裝真顯目，大聲唱佢人个愛戀歌：「蟬⁵——蟬蟬蟬——蟬——蟬蟬蟬——」佢人攞背一臺自家做个放送頭，遐聲音放送到真遠都聽會著。佢心情好个時務，即阿腦佢人唱歌真好聽，心情無好个時又感覺佢人注死耳鼻。毋過一想著佢人來到這世間，正有短短幾下

日，就真佩服佢人恁勇敢認真打拚个精神，來完成唯一愛做件事——傳宗接代，遐即無麼个好怨嘆，嘛原諒佢人个大聲野喉啊。

在這鬧熱个時務，佢人擔凳恬恬坐在蔗脣詳細聽，猶會發現佢人毋係儘採唱个哦，知照順序有條理，有時獨唱有時合唱輪个來，像有人指揮，聲音有清亮、低沉、有時大有時細，發出个聲無幾共樣，有个較尖有个較溫柔。其實，蟬有真多種，有一年、三年、五年、十三年、十七年，長年攞蹓在泥底不見天日。在隱居个泥底，培養破土个熱情；在多年个等待，化泥底能量做聲量，衝破重圍，就為著這短短幾下日个自由飛出。

佢心肝底直直想：這蔗蔗無落肥，敢係因為聽了蟬熱情清亮个歌聲，正越生越高越弓？恁佢人，嘛愛像蟬恁知足，知恩圖報，逐日歡頭喜面，這一世人就多姿多彩啊！

¹ 闊目：音 lang^ˇ hm^ˊ；指甘蔗目與目的距離比較長，代表長得很好。

² 炎炎兒：音 rhiam rhiam rhi；草蟬的叫聲。借字。

³ 煞棚：音 sad^ˊ pang^ˋ；結束。

⁴ 烏蟬：音 bbu^ˊ hiam^ˋ；此指臺灣熊蟬。

⁵ 蟬：音 hiam^ˋ；此指臺灣熊蟬的鳴叫聲。

112 年全國語文競賽客家語朗讀文章國中學生組（詔安腔）

編號 5 號

【虎頭蜂叮著記】李政暉原作

得虎頭蜂叮著啊！

遐日晨早去山底巡水做事，無睭著路脣个竹林面上有大個蜂
藪，嘛無細義撞著¹遐支竹篙佢人即尋著佢。惡豺豺²个蜂黏時即飛
在佢四輪轉，對佢臉身黏過來。佢陪著一隻睭，知係虎頭蜂即驚
著攔緊走，著面退著面陪臉身和頭那毛面上个蜂。退到無蜂个所
在正感覺頭那浮浮人怪怪，緊行轉屋下討歇一下。

無幾久佢頭那殼、臉身、手髒和脅下開始作埕會疾：頭那殼
感覺即像雲漂在天竦，又得人縲蹠浮浮腫腫攔纏纏，頭那暈暈³無
法度思考。倒手手婆腫到像紅靛，手痺痺、手指尾會伸毋會鉤；
坐毋會核⁴睡毋會去，唉唉唧唧真成艱難。哪係有陰間，遐個時个
佢應該係蹠在內底。

落尾得人送去病院掛急診，講著有十外隻个蜂叮著佢了後，
醫生真認真對佢講：普通來講虎頭蜂叮著二十針以上即可能有生

命危險，這款个蜂無解毒个血清，較嚴重有時務會引起過敏性休
克抑係溶血个症頭，頭好愛先通知你屋下底个人。醫生安排吊大
筒⁵、注射和抽血，交代佢先歇睭，若有麼个無堵好愛黏時講。

等佢略略睡一斂了後，感覺好真多即想討轉去。毋過醫生愛
佢加歇一下觀察睭望，頭好等屙尿个尿水色正常，若係變烏暗泥
色即較麻煩愛送大間病院。愛攔等一下，無麼个問題正會用出
院。頭尾攔無問題醫生猶係掛心講：「開个藥愛照三頓食，有麼
个無快活即愛攔緊過來哦。」

轉屋下換衫褲正知攔總叮著十六針，兩隻手髒發癢紅腫，真
成癢。倒手婆猶係紅腫無感覺、頭那暈暈想討睡。睡到半夜直直
爪，癢到硬討拗皮掀開、爪入骨頭髓去。食藥、抹藥無麼个效。

這滿蜂叮个所在結疔啊，睭著這兜堅疔即攔一擺得佢想著：
遐個時務遐兜蜂，佢一個人在山底有幾危險。

¹ 撞著：音 dung choo；接觸、碰到某物。

² 惡豺豺：音 oo' sai' sai'；很凶惡的樣子。

³ 頭那暈暈：音 teu' na' hin' hin'；頭暈暈的、頭暈目眩的樣子。

⁴ 坐毋會核：音 coo' m' bboi hed'；坐不住。

⁵ 吊大筒：音 deeu' tai tung'；吊點滴。

112 年全國語文競賽客家語朗讀文章國中學生組（詔安腔）

編號 6 號

【金黃色个旅行】曾雪蓉原作

旅行係一種真好个休閒活動，會用得人个心情鬆爽，拗頭靚个回憶留落來，另外旅行嘛係一種學習，有一句事講：「行萬里路，贏過讀萬卷書」，在旅行个時務，沿路睇著个、聽著个，可能比在書內底學著个猶較精彩、心色。

在印象內底，佢頭懷念个一擺旅行，係前幾下年佢八月半个時，爺哀渡歸屋下人去花蓮寮。

佢人來到花蓮富里个六十石山，歸路感覺花蓮个空氣特別好，一聲又一聲大鷓婆歡喜又自在个歌聲，響在彎彎幹幹个山路，佢人在高高个雲岫迴來迴去，展開大大个翼，無分日夜在這片山頭巡邏，佢人係這片天地个山大王，嘛係保護者。

等阿怙拗車歇在忘憂亭，佢一落車即睇著滿山坪个金針花開到鬧鬧、真顯目，想起識在電視睇過一個紹介花蓮金針山个節目，講這跡位係一個靚到會得人「起童」个所在，這句事正經半點都毋會差；佢企在這高高涼亭个時，睇著歸片个山頭，變成金黃色个世界，當合著泥香、野花香个山風對面吹過來遐下，毋知仰子，佢个心肝頭有一種感動攔有幸福个感覺，佢想這即係大自

然个力量。

阿怙講：「前人種樹後人涼，前人種竹後人搖。」這山頭个金針花，係真多前人開山打林開墾出來个，所以來到這遊寮个時，愛知寶惜，毋單拗這个美景用相片隨轉屋下，嘛愛拗自家个垃圾處理好，恁年年正會有靚靚个風景好欣賞啊。

當夕陽像一粒深紅个柑子，掛在天岫个時，本來開到真有精神个金針花，像約定好共下下班个樣，攏目珠眨眨相偎憑，恬恬仔睡去啊；難怪金針花又喊做「一日美人」，佢跔日頭起來又在日頭落山个時，合起佢錫人个花蕊衫裙，做一個靚一日个美人。

時間過去真久，一半下佢猶係會想起遐擺「金黃色个旅行」，親像又聽著大鷓婆歡喜个歌聲，真久……真久。

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹个背項升趺起來，金哲哲仔又晟眼个金光射入天頂。佢踏等該臺一騎就響歸路个老腳踏車，來到佢个百果園，還話講今晡日日頭一出來就到，算蓋早了！無想著，正踏入園肚裡，隔壁種大梨个阿權哥就在該大聲咻了！「喂！日頭恁高了正到哦，敢做有事？」

唉！佢都恁早了，還輸佢，這阿權哥係歸暗晡毋使睡係無？做麼个做得七早八早就來到了？心肝還想緊，嘴項又毋肯認輸，就應佢：「無啦！毋係來做事，來看鷓鴣个啦！」

佢个林園在山龍圍等个窩壠肚裡，係堵著像今晡日恁呢个好天時，打早就會有三、四隻大鷓鴣，在四周圍个山嶺頂飛啊飛。

同阿權哥个嘴鼓都還言打煞，聽著遠遠个所在傳來「咻！咻！」个聲，鷓鴣出來了！阿權哥看著鷓鴣出來，做等个山園事頭也毋想做了，跔等一陣來搨接梨个工人，坐在佢工寮个涼影下欣賞這場大自然个表演。

看佢等閉開長長个翼胛、跔等燒氣，慢慢仔迂、定定仔飛，

緊迂緊高、緊飛緊遠，尾項變做天邊个一粒烏點，親像優雅个天頂王者，對天頂看佢等守護个土地。

下把仔，會看著佢等挺等胸脯、目盯盯仔停在脣口个樹極頂高，好恬恬仔無聲無說就舂一路下²，一矚目，轉身又飛往上，尖尖利利个爪項，夾等一尾挨著神頭个蛇哥伯，就一路「咻！咻！咻！」風神碌碌飛入密密个樹林裡背。

又有時節，看佢等在高高个天頂迂啊迂仔，忽然間，兩片翼胛一收，對天頂直直跌一路下，佢心肝肚還想等：「這隻鷓鴣這下定著穩死了！」毋過，看佢明明都會撞著地泥了，拓拓風翼胛一閉、利爪一伸，黏時在一矚目時間，厥利爪項就抓著一隻圓身還在扭啊扭个大老鼠，一轉身又飛啊半天高了！

歸陣人看鷓鴣表演看啊嘴擘擘，有人講：「難怪，在這個林園做恁久事頭，難得看著蛇哥，就係有這兜鷓鴣守護這片土地，歇在這仔个老嫩大細正有好安心生活啊！」

¹ 鷓鴣背：音 ieu po^ˇ zui^ˋ；東勢東方山峰名，華語稱鷓鴣山。

² 舂一路下：音 zung^ˊ id^ˋ lu ha^ˊ；往下俯衝。

編號 4 號

【甘蔗下个蟬仔】羅紫云原作

屋脣該墩白甘蔗，種幾下年了蓋大墩，剝核又會再綻筍，繼續煞猛生啊青柳柳仔，長目多汁，清甜好食。

每年大體對五月開始，日日到臨晝邊，就會有一大陣著等青衫、蓋靚蓋得人惜、頭大尾尖翼長个草蟬，細細仔像手指尾恁大隻仔，黏在這長長、青色个甘蔗葉下煞力牯叫，像在該啦歌哩曲樣仔，一等鬧熱。佢等總係唱等：「揸揸揸啲¹——揸揸揸啲——」清亮个歌聲，一直到下晝兩點零正會煞棚，完全無喊瘡。

草蟬下班，嫲牯蟬²跔等上棚。毋過，嫲牯蟬係黏在白甘蔗脣該墩榮榮个苦棟樹頂。佢算係最大隻个蟬仔，圓身著等一身烏色个西裝蓋亮線，大聲唱等佢等个愛戀歌：「蟬³——蟬蟬蟬！蟬——蟬蟬蟬！」佢等都背等一臺自家製造个放送機，該聲音放送啊盡遠都聽得著。佢心情好个時節，就阿腦佢等唱歌仔蓋好聽，心情毋好時就會試著佢等吵耳塞鼻了。但係一想著佢等看著這個世界，單淨短短幾日仔，就一等佩服佢等恁好膽、煞猛打拚个精

神，來完成唯一愛做个事情——傳宗接代，該就無麼个好怨嘆，乜會原諒佢等恁呢盡命牯緊叫了。

在這鬧熱个時節，佢兜張凳仔恬恬坐在甘蔗脣詳細聽，還會發現佢等毋係儘採唱个哦，曉得照順序、有條理，成時獨唱、成時合唱，像有人指揮樣仔。聲音有清亮、低沉、有時大有時細，發出个聲無多共樣，有个過尖有个過溫柔。其實，蟬仔有蓋多種，有一年、三年、五年、十三年、十七年，長年都屏在地泥下，麼个都看毋著，淨培養破土个熱情；在多年个等待中，同地泥底下个能量變做歌聲，拚出重重包圍，就係為著這短短幾日个自由。

佢心肝肚緊恁：這墩甘蔗無掖肥，毋知係因為聽了蟬仔熱情清亮个歌聲，正緊生緊高緊榮咩？嘎佢等，乜愛像蟬仔恁知足，知恩圖報，每日歡喜暢樂，這一生人就豐富精彩了！

¹ 揸揸揸啲：音 iam iam iam i；草蟬的叫聲。借字。

² 嫲牯蟬：音 ma^ˇ gu^ˇ sam^ˇ；此指臺灣熊蟬。

³ 蟬：音 sam^ˇ；此指臺灣熊蟬的鳴叫聲。

【虎頭蜂叮著記】李政暉原作

分虎頭蜂叮著了！

該日朝晨去山頂遠水做事，無看著路脣个竹林頂項有大蜂竇，一下無細義揆著該支竹仔，佢等就尋著佢。惡豺豺个蜂仔黏時就飛啊佢四周圍緊迂，對佢个圓身黏過來。佢揸著一隻正知係虎頭蜂就嚇啊盡命拈走，一片退一片揸圓身同頭那毛項个蜂仔。退到無蜂仔个所在正感覺頭那暈暈人怪怪，共快行歸屋下眠一下。

無幾久佢个頭那、圓身、手髀同脅下開始都會痛了：頭那感覺就像雲漂在天頂，又分人綁等，暈暈腫腫又纏纏，歸粒頭那暈暈無法度思考。左手个手巴掌腫啊像龜板，手痺痺、手指尾會伸毋會鉤；坐毋核又睡毋落覺，唉唉唧唧正式艱辛。係講有陰間，該時節个佢應該係歇在裡背。

落尾，分人送去病院掛急診。講著有十過隻个蜂仔叮著佢過後，醫生蓋認真對佢講：「普通來講，分虎頭蜂叮著二十針以上，就可能有生命个危險。這種蜂仔無解毒个血清，過傷重¹个有

¹ 傷重：音 song' dong；很嚴重。

時會引起過敏性休克抑係溶血个症頭，最好愛先通知你屋下个人。」醫生安排吊大筒射²、注射同抽血，交代佢先眠一下，係有麼个毋堵好愛黏時講。

等佢略略仔睡一下過後，感覺好加蓋多了，就想愛歸去。毋過，醫生愛佢奈加一下、觀察看啊，最好等屙个尿色正常；係講變烏暗泥色，就過麻煩，愛送大間病院。喚佢愛再等加一下，無麼个问题正做得出院。最尾，都無問題，醫生還係掛心个講：「開个藥仔愛照三餐食，有麼个無爽快就愛再共快過來哦！」

歸到屋下換衫褲个時節正知，總共叮著十六針，兩隻手髀發炎紅腫，一等癢。左手个手巴掌還係紅腫無感覺、頭那暈暈緊想愛睡目。睡到半夜盡命拈爪，癢啊險同皮掀開、爪入骨髓。食藥仔、擦藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效。食過後，該暗晡正式有神，就好睡、毋會癢了。

這滿蜂仔叮个所在已經結疔了，看著這兜結个癩仔就再過一擺分佢想著：該時節个該兜蜂仔，佢一個人在山肚有幾危險。

² 吊大筒射：音 diau tai tung' sa；吊點滴。

112 年全國語文競賽客家語朗讀文章國中學生組（南四縣腔）

編號 6 號

【金黃色个旅行】曾雪蓉原作

旅行係一種盡好个休閒活動，做得分人个心情鬆爽，同最靚个回憶留下來。另外，旅行也係一種學習。有一句話講：「行萬里路，贏過讀萬卷書。」在旅行个時節，一路項看著个、聽著个，可能比在書項學著个還過精彩、生趣。

在印象裡背，佢最懷念个一擺旅行，係前幾年會八月半个時節，佢爺哀帶歸家人去花蓮遶寮。

佢等來到花蓮富里个六十石山，一路項感覺著花蓮个空氣特別好。一聲又一聲大鷓鴣歡喜又自在个歌聲，響在彎彎幹幹个山路項。佢等在高高个雲項迂去迂轉，閉等繃雄个翼胛，日夜在這片山頭緊遶。佢等係這片天地个山大王，也係保護者。

等阿爸同車仔停在忘憂亭，佢一下車就看著滿山坪个金針花開啊蓋鬧、蓋打眼。想起識在電視裡背看過一個紹介花蓮金針山个節目，講這仔係一個盡靚盡靚个地方，這句話正經一息都毋會差。佢企在這高高个涼亭項，看著歸片个山頭，變做金黃色个世界。就在間等泥香、野草花香个山風對面項吹過來該下，毋知仰仔，佢个心肝頭就有一種感動還有幸福个感覺，佢想這就係大自

然个力量。

阿爸講：「前人種樹後人涼，前人種竹後人搖。」這山頭个金針花，係盡多前人開山打林開墾出來个，故所來到這遶寮个時節，愛曉得珍惜，毋單淨同這美景用相片帶歸屋下，也愛同自家个地坵處理好，恁呢，年年正有靚靚个風景好欣賞哦！

臨暗頭个日頭，像一粒黃蠟蠟仔个柑仔掛在天邊个時節，本旦開到盡有精神个金針花，像約定好共下下班樣仔，全眨等目珠互相憑等，恬恬仔睡核了；難怪金針花又安到「一日美人」。佢跔等朝晨个日頭踰床，又在日頭落山時節，合起厥錫人个花蕊衫裙，做一個靚一日个美人。

時間過核蓋久了，有時節佢還係會恁起該擺「金黃色个旅行」，蓋像又聽著大鷓鴣歡喜个歌聲，盡久……盡久。